

# KERATAN AKHBAR

---

TARIKH : 14 JUN 2020  
AKHBAR : HARIAN METRO  
MUKA SURAT : -

## 30,968 peneroka disasar sertai PPP Felda

KERAJAAN menyasarkan 30,968 peneroka terbabit secara langsung dalam Program Pembangunan Peneroka (PPP) Felda menjelang akhir tahun ini.

Projek perintis PPP sudah bermula di Felda Bukit Rokan, dekat Tampin, akhir tahun lalu membabitkan 200 peneroka.

Menteri di Jabatan Perdana Menteri (Ekonomi) Datuk Seri Mustapa Mohamed berkata, antara projek PPP yang diusahakan ialah tanaman cili, sayuran, cendawan tiram dan ternakan arnab.

Katanya, fasa satu projek perintis di Felda Bukit Rokan sudah bermula 65 peratus di kawasan seluas 30 hektar.

"Jika berjaya PPP akan diperluaskan ke tanah rancangan Felda lain di seluruh negara membabitkan 11 Wilayah Felda.

"Ternakan arnab misalnya berpotensi untuk dimajukan secara besar-besaran berikutan mempunyai permintaan tinggi dan ia boleh dilaksanakan dalam PPP," katanya pada sidang media selepas lawatan kerja di Felda Bukit Rokan, hari ini.

Hadir sama Pengarah Besar Felda Datuk Dr Othman Omar dan Ketua Peneroka Felda Kebangsaan Sulong Jamil.

Mustapa berkata, kerajaan memperuntukkan sebanyak RM250 juta setahun dengan projek dijangka dilaksanakan dalam tempoh empat tahun.

Katanya, Koperasi Permodalan Felda (KPF) berperanan dalam membantu memasarkan hasil yang diusahakan peneroka dalam projek PPP ini.

"Menerusi PPP golongan peneroka mampu mempertingkatkan taraf kehidupan serta berupaya mencipta rangkaian ekonomi negara," katanya.



Mustapa Mohamed (tiga dari kiri) meluangkan masa melihat ternakan arnab daging ketika mengadakan lawatan kerja ke Felda Bukit Rokan, Wilayah Raja Alias. FOTO AZRUL EDHAM MOHD AMINUDDIN

## KERATAN AKHBAR

---

TARIKH : 14 JUN 2020  
AKHBAR : SINAR HARIAN  
MUKA SURAT : -

### **30,968 peserta PPP menjelang hujung tahun**

Mustapa (tiga dari kiri) mendengar penerangan daripada Pengerusi Kami Anak Felda Malaysia, Fakhrurrazi Mohd Habib (dua dari kiri) mengenai ternakan arnab.

TAMPIN - Kerajaan menyasarkan seramai 30,968 peneroka Felda melalui penyertaan dalam Program Pembangunan Peneroka (PPP) menjelang hujung tahun ini.

Menteri di Jabatan Perdana Menteri (Ekonomi), Datuk Seri Mustapa Mohamed berkata, ketika ini projek perintis PPP yang melibatkan komuniti tersebut sedang giat dilaksanakan di Felda Bukit Rokan.

Menurutnya, projek rintis melibatkan 200 peserta itu telah bermula sejak penghubung tahun lalu yang telah mencapai kemajuan kerja sebanyak 65 peratus pada fasa pertama.

"Projek rintis di tanah seluas 31.16 hektar ini membabitkan sektor pertanian dan penternakan antaranya arnab pedaging, cili fertigasi sayur berdaun, cendawan dan sayur berdaun," katanya pada sidang akhbar sempena lawatan kerja ke Felda Bukit Rokan, Wilayah Raja Alias di sini hari ini.

Hadir sama, Pengarah Besar Felda, Datuk Dr Othman Omar dan Ketua Peneroka Felda Kebangsaan, Sulong Jamil.

Mengulas lanjut, Mustapa berkata, daripada RM250 juta peruntukan yang disediakan kerajaan bagi PPP seluruh negara, RM10 juta diperuntukkan bagi projek PPP di Felda Bukit Rokan.

Menerusi PPP katanya, golongan peneroka mampu mempertingkatkan taraf kehidupan serta berupaya mencipta rangkaian ekonomi negara.

"Kejayaan projek PPP di sini akan menjadi contoh kepada peserta lain untuk berdaya saing menambah pendapatan selain tidak hanya bergantung kepada hasil tanaman getah dan kelapa sawit.

"Koperasi Permodalan Felda (KPF) berperanan dalam membantu memasarkan hasil yang diusahakan peneroka dalam projek PPP ini," katanya.

Artikel Penuh : <https://www.sinarharian.com.my/article/87751/BERITA/Nasional/30968-peserta-PPP-menjelang-hujung-tahun>

